

PABLO NAAJIONEE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaara naajioquiaari

¹ ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa pohuatariquiano taa na Que Pueyaso paniquiaaricuajani. Pa tarajanu Timoteota naajiyi nionijia. ² Niaacuara naajiyanjia, canapue Pueyaso saquiriojoquiaaricuajani tama nerajaaja nia quiniuria. Nijaniyacuaajaari maninia tiuquiaa Pueyasooqua, Cristo rupuesano nia quishacari. Pa Que Pueyaso cuara cumaquiiria nijaniya, shuquiriaatia nia quiniuria, juhujaniya nioojia quiniuriajuhuj.

Pablo secojosano Jesuucua tiuuniaa pueyacuara

³⁻⁴ Canaari pohuatasaacanuni taa nia tiuquiaa Jesucristoocuaani, naajuhuj, taa nia paniya puetunu niarta Pueyaso muerasujuanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quenea”. ⁵ Niaari naa maninia quiyatej, nia niishishacari Pueyasoori jiyanohua maninia pa miiniutianiya na niqitiosacari pajaniya jiyocuacaanu na jitiiasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa. ⁶ Cuno maninia rupaari puetunu jiyacajinijanaa paaqueyaree, mariyata taa na paaquecanucuaa na pohuatasacari nia tiacajiniacuaani. Pueyaso Rupaari maninia caneyaree queraatia pueya jiuujajinia, mariyata taa na caneya nioojiacajiniacuaani. Naa caneyari nia niishishacari Pueyasoori seetanujanaa pa paniya, taa nia

pohuatasaaquiaaricuajani. ⁷ Pa panishano Epafrasri naa pohuataquiaari niajanियatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸ Nojuajaari canaa pohuatarucuaa niajanियajiniji, naajuhuj taa Pueyaso Sohuanu panitiooteya niajanियani.

⁹ Naaratej, canaa jaara tojiquianu niajanियajinijini, maajari canaa tarinitianu quiriquiaa Pueyaso secojonu niaacuara. Canaari Pueyaso secojoquiaani, nojuaja cuara nia jataniiria niishijara nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniurajuhuj.

¹⁰ Naa jaara Pueyaso panishano niishijaca quiri, naacuajitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuquiritianura niajanिया, pueyaracaanu maninia nia quishacari. Naaari puetunu maninia casaajanaa miiniutianiya. Naajuhuj, niaari socua maninia niishiniutianiya Pueyaso.

¹¹ Canaari Pueyaso secojoquiaa niaacuarajuhuj, Pueyaso cumaquiniuria niajanिया puetunu na cumaacatajanaa. Jiyanojua maniaari na cumaaca, shuquiriaatia nia rejeretanura juhujaniya puetunu casaajanaa.

¹² Canaari Pueyaso secojoquiaajuhuj niaa cuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jitiisanoiniji pajaniyara, cuhuashiqui quiquiojinia pa quishacari.

¹³ Pueyasoori ninishiquiji pa jayoquiaari, maja Sesaaca jitianura socua pajaniya. Pa jiyatereeri cuhuashiqui quijiaca pa quiniuria, Neyanuniyosua jitiisanano pa quiniuria maninia cutara. ¹⁴ Tama Neyanu cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

Paari maninia quiya Pueyasotani, Cristo cusonuucua pa niti

¹⁵ Pueyasoori maja niquishano quijia. Cristo cutaraari niquishano. Nojujaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacarijia puetunu casaajanaa. ¹⁶ Na Que Pueyasoori na shipinitiquiaari puetunu casaajanaa jiya cajiniocua, mijirianio; niquishano casaa, niquiyaquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jiitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojujaari puetunujuanaa shipiniquiaari. Tama nerajaaja na shipiniquiaariiri. ¹⁷ Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojujaari puetunu na shipinishanojuanaa cojuua, maninia na quiniuria. ¹⁸ Cristoori Pueyaso muerasu Jiyaniijajuhuj, taa poojia quiya pa cuaqueya jiyaniijiacuaani. Puetunu Pueyaso muerasujuanaari juhua Cristo cuaqueya quiya, pa miiniuria na panishano mijiria. Nojujaari juhua poojia. Nojujaari pa samiitianijia, juhua na cuaqueya pa quishacari. Nojujaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacuajitij, Cristoori coteenu quijia. Nojujaari Jiyaniijajuhuanajaj. ¹⁹ Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniurijuhuj. Naacuajitij, Cristoori maja rimiajata quenaaja na quiniu na Quejiniji. ²⁰ Naajuhuj, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusonutajaaja niyacutesanojinia. Na Que rupetequiaariuhua puetunu casaajanaari, jiyocuacaanu casaa, mijiria casaanio.

²¹ Tarijia, niaari Pueyaso paraa quiquiaari, juhua taan-usano pueya Pueyasojiniji, sesa miijiaca nia quiniuucua. ²² Saniniuujia quiarijiani, Pueyasoori nia rupetequiaar-
 iuhua nocua, Cristo cusunuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishano-
 jiniji. Majaari quenaaja shiitianiyojua sesa nia quiniu quiniutianiya na niqiara. ²³ Niaari naa quiniutianiya maninia, niaa jaara cumatia rupaaquiaa Cristoocua, nocua nia tiuushacari, nioojia nia niqijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa ni-
 aara, taa nia tojqiuiaaricuajani. Nia tojishano Pueyaso rupaacuajaari tari pohuatasaacanu puetunu jiyacajinia-
 janaa. Janiya, Pabloni, janiyari na pohuatanu naacutaa-
 jaaniuhuj.

*Pablo Pueyaso pueya maanu cumaquiniara
 jiyatesaaquiaari*

²⁴ Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocuajuhuj. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiqiyocuatej, janiyari Cristo naquiya miiniu tucataa tama cua cuaqueyajiniajaajani. ²⁵ Pueyasocujaari cua jiyatequiaari na saquiriojosano pueya cua jiitianura, cua cumaquiniuria nijaniya puetunu na rupaatajanaa. ²⁶ Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuaaanu quijiaca. Quiari naataja

cutara, Pueyasoori jiyasohua na rupaa niishitiquiaari tama na saquiriojosano pueyarajaaja. ²⁷ Pueyasoori pa niishitiniu paniquiaari taa jiyanhua shacantuuca na cumaaca quiya nijaniyarani, canapuate maja na saquiriojosano Judiocuaca quiquiaaricujani. Niocuajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiitiasacari Cristo, niaari niishiya niaari shacantuuca quijiara jatanishaanutaniyajuhaaj.

²⁸ Naaratej, Cristocuajaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucujanaa maninia canashitishano pueya, Cristo rupuesano nojori quishacari. ²⁹ Naaratej, puetunu Cristo niquitiosano cumaacatajanaa jiyanhua poonijioquiaanijia, na cumaquishacari janiya.

2

¹ Pueyanaa, janiyari paniyani nia niishiniuria taa jiyanhua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhaaj, puetunu juhuanajuaja cua niqiyaquiniaa pueyacuarajanaano. ² Jiyanhua secojoquiaa niaacuaranijia, nioojiaca cumaquishaanura, nioojiaca rupuetoonura jatiquijiuhuaaj, jiyanhua nia panitioosacari. Naajuhuaaj, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. ³ Neyanu Cristocuajaari puetunu niishijajanaa. Majaari tamonu niishijia quiniu juhua nojuaja. Jiyanhua maninia miiijia puetunu na niishishanotajanaari. ⁴ Janiyari nio sequeya nijaniyani, tamonu mariqui nia sapojoreeri najuhuaana tamaatia na pohuatasano. ⁵ Majaari

cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiquni nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

⁶ Niaacuaajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. ⁷ Maninia nia rupuetooore Cristota, naatej, taa naana cumaatia nujuaacuaani, jaara tucumaaca nujuacaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaaricuaajani. Cunora, pueyaracaanu nia sequeriquia Pueyaso: “Paacarasho canaa Quenaan”.

Niaari quiarinio pueya, Cristo quishacari nioojiajinia

⁸ Tama nia cuaqueyajaaja nia cojuare, tamasaca mariquini nia sapojoreeri tamaatia nojori niishishanota najuhuanaj. Naa jaara nojori niishitiojosano tojitiariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhuj.

⁹ Nocuaaji saaja Cristo nia tojiri. Tama Cristo cutaraajaarijia puetunu Pueyaso cumaacajanaa jiiitaja, puetunu na niishitiajajanaanio. ¹⁰ Naajuhuj, niaari Pueyaso cumaaca jiiitiaa, na niishitiajajanio, nia rupuesacari Cristo. Naacuajitij, niaari puetunu nia panishanojuanaa jiiitiaa tari, maninia quijiaca nia quiniuria. Cristojuanaari Jiyaniijiajanaa. Cristo jaara na jiyarore, puetunu tamonu cumaacaraca quijiacajanaari na tojitiaa; jiyocuaaanu camarnu, mijiria camarnunio. ¹¹ Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuquia co miatesaanu quiquiaari, taa Judiocuaca miiquiaacuaani. Nojoriiri miatesaaquiaa nojori niishini-

uria nojori cuaara quiiria saa Pueyasoraja, maja sesa miiija nojori quiniuria socua. Cuno, miatenuni, majaan pueyano na jataniniu sesa na miiniujiniji. Cristo cutaraari sesa niiojia jataquiaari, seetanujuanaa sesa nia quiniu jatasaanura puetunujuanaa. ¹² Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacia nia tiuushacari. Niaari samiitianishaarohua taa Pueyaso samiitianiquiaariuhua Cristocuaani. ¹³ Niaari juhua macu quiquiaari tarijia, sesa miiijacia nia quishacarijia, sesa jiuujiaraca nia quishacarijiano. Jiyacaritij, Pueyasoori nia samiitianiquiaari Cristota, na jiyanooohacari nijaniya puetunu sesa nia miishanojinijijianaa. ¹⁴ Pa tojiyaquishacari tariucuacaanu Pueyaso rootasano, paari puecoosocoriquiano quiquiaari juucuan. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiutiaquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaan sesa pa miishano tiutiasaanu pocua. ¹⁵ Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaaquiaacuaani, pueya niqiara macaatishocoriquiano.

Saaja Pueyaso casaacia nia jiaatariquia

¹⁶ Naaratej, majaan nia tojiniu noo pojori, canapuate nia tojitiniu saniniujiya supuetana niishitiojosanocujani. Nojoriiri najuhuana niishitiojoquiaa casaa sumatuute puereshiyani, rusanonio. Nojoriiri niishitiojoquiaajuuhuj teyano juucate poonijiaquishiyani, naajuhuj,

Pueyaso niquiara pa queranacunuunura raca macura. Nojoriiri naa niishitiojonuuquiaa nojori jiyanihacari paa jaara naa miyaquirini, Pueyaso mariqui pa sanitioreeri. ¹⁷ Puetunu cuno supuetanaa niishitiojosano-juanaari tariucuacaanu quiquiaari, miriqui na niishitiojonura pueya taate seetanujuanaa quiniutianiyani Niriquiano jaara tiuquiri. Cuno Niriquianocujaari Cristo. Tari tiuquiaariiri. Nojuajaari pocuaji Tacuna. Naaratej, majaari socua pa tojiniu cuno miriqui niishitiojosano. Quiarijia saaja Cristo pa tojiri cutara. ¹⁸ Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano nijaniya maseyaquiriiri. Nojoriiri tama na cuaqueyajaaja shuquiritiaquiaa na jiyanihacari nojori maja Pueyaso shocotaja na quiniu nojori secojosacari Pueyaso seya, maja Pueyasojuanaa. Nojoriiri tama na maquenujinia na niquishanoocujaaja tiuujiaca, maja Pueyaso rupaacua. Naacuajitij, nojori tiuushacari tama na niishiriojosanoocujaaja, nojoriiri seetanujuanaa pueya shocotajaca quiya. ¹⁹ Nojoriiri maja na rupuenu Cristo, juhua poojia Cristo quishacari, na cuaqueya pa quishacarijiuhuj. Paa jaara maninia rupuetesano quiri poojitatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhuatajanaani, pa cusorohuatano. Pueyasoori naa pa maashitiniu panijajuhuj Cristota rupuetootesano pa quishacari.

²⁰ Niaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Niajanijariuhuj? ¿Casaara nia tojitiaajaa cuno tariucuacaanu rootasani? Niaari juhua nareja mijiria quiniaa quiyaja, nia tojishacarijia cuno rootasano. ²¹ Supuetanaari naa piriyojoquiaaritij: “Maja pa quianu cuno. Maja

pa miaquenu cunojuhuaj. Maja cuno pa cooniu". Pa supuetanaari naa sequejatej. ²² Naajaa, puetunu cuno pueresano casaajanaari saaja shaajeja pa secojinia. Majaari poojia na miiniu sesa. Cuno tariucuaaanu rootasanoori saaja tama pueya niishishanojuaaja quiquiaari. ²³ Paa naasucuaari jiyaniyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puerereni, naajuhuj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuana Pueyasora. Cunoori maja na naacunu pajaniya sesa casaacua pa jiaatiaaquiniuria.

3

¹ Niaa jaara samiitianishaaquiaari Cristota, jiyocuaaanu Pueyaso jiitiasanoocua nia jiaatiare, tee Cristo cajiya na Que Pueyaso miaquetajjaracuajani. ² Pueyaso casaacua nia niishiriojore saaja, maja mijiria casaacua. ³ Puetunu tarijia sesa nia quiniujianaari tari juhua jamosaaquiaari, niaa jaara Cristo cusonu jiyatere tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa samiitianijia. Saniniuujia, juhuanojuaja maja niishishano taamueca quijiaca pa cuaqueya quiniutianiyani. ⁴ Cristo jaara muetarohua pocua mijiria, shacantuuca cumaacaraca quijia na quishacari, jiyacaritij, paari jatanishaanutaniyani shacantuuca cumaacaraca quijiaca pa quiniuria nata, juhua nojuajuhuj.

Maninia rootasano Pueyaso muerasura

⁵ Naaratej, nia cuaqueya cuara quiiria juhua macu tama nia niqiarajaaja, nia cuaqueya nia ruuretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitiano. Nia cartere

puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatiajaari juhua Pueyaso ruuretaja quiya, tama na jiitiasano casaacuajaaja na tiuushacari juhua Pueyasoo cuaja. ⁶ Pueyasoori jiyano hua saniitionu-taniya na tojiyashijiaca, canapue te naa sesa quijiacacua-jani. ⁷ Pueyaso tojiyashijiaca nia quishacari tarijia, niaari naa sesa miijiaca quiquiaari. ⁸ Quiarijiani, nia tarini-tiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jiyano yashijia nia quiniu. Maja sesa miijia nia quiniu. Maja pueya sesacaja nia quiniu. Maja sacuaraatia na-juhuana nia niti taquiriocuateja nia quiniu. ⁹ Maja nia cuaracashijitoonu. Niaari tari jatanishaaquiaari tarijia sesa nia quiniujiniji, sesa jiuujiaraca nia quishacarijia, sesa miiniuucua jiitinio nia quishacarijuhuaj. ¹⁰ Niaari quiarinio jiuujiaraca quijiaca tari. Quiarijiani, tama nia cuaqueyajaarijia tari jataa juhua nia Shipininia Pueyaso nia quiniuria, seetanujuanaa Pueyaso niishijia nia quini-uria. ¹¹ Pueyaso jatanishano pueya pa quishacari quiar-ijiani, majaari tari rimiajata pa quiniu, paa jaara Ju-diocuaca quiyani, tamasaca pueyano; na cararaatiuuquia co miatesano pueya, miatesoo pueyano. Paa jaara tahue quiyani, juhua mococori, poonijjotesano pueya, camar-nuuju pueyano, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poojiajinia quiyajuhuj.

¹² Pueyasoori nia saquiriojoquiaari saa maniniaja nia quiniuria nera. Niajanitari na panishano muerasu. Naaratej, pueyacua taraajeja nia quiri. Maninia miijia nia quiri. Majaari nia jyaniniu tama nia cuaqueyajaarijia socua maninia tamonujiniji. Maja juaajia nia quiniu. Jacaria pocuaja nia quiri. ¹³ Jacaria nacasutoojua nia quiri. Maninia nia jyanoori cante sesa miirii niajaniyani. Taa pa Jiyaniijia jyanooquiaari pajaniyacuaani, naa nia

jiyanootioorejuhuaj. ¹⁴ Seetanujuanaa pueya panijiaca nia quirijiuhuj. Cunoori socua jiyanoehua panishano. Panitioojuaca nia quishacari, puetunu nia miishanojuanaari jiyanoehua maninia quiniutianiya, jatiqúi nia quiniurijuhuj. ¹⁵ Naajuhuj, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhuajaniya quijiaca nia quiniuria, maninia rupuetootesano. Pueyaso muerasu cuaara jatiqúi poonijionuujuaca quiiria, naatej, taa pa cuaqueyajiniacuma casaa puetunujuanaa jatiqúi quiyacuaani. Majaari nia juaatiojonu. Naajuhuj, Pueyaso nia shuquiritiare pueyaracaanu, puetunu maninia na miishanojinijijianaa niaara.

¹⁶ Nioojia cuaara quiiria mishaja Cristo rupaata, jiyanoehua na tojijiaca nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitioojore puetunu Cristo niishishanotajanaa. Naa jaaquequejonuure Pueyaso Rupaa naajiosanojiniji, pueya naajiosanojinijijuhuj, Pueyaso Sohuanu niishitiojosano niajaniyano. Naa nia jaaquequejore Pueyasora, nia shuquiritianuta nojuaja. ¹⁷ Jesucristocuaajaari nia Jiyaniijia quiya. Naacuajitij, niaari na sesaanucua. Naaratej, nia sequesano, nia miishanojuhuaj, puetunu cunojuanaa cuaara quiiria maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquiniucua niajaniya.

Maninia mijia pa quiri Pueyaso muerasu pa quishacari

¹⁸ Maajipohuanaa, nia niyaca tojitiajaca nia quiri. Pa Jiyaniijiaacua tiuujiaca cumaati naa miiquiaaquij. ¹⁹ Pueyanaa, nia niquiocua nia paniri. Majaari na juaaniu. ²⁰ Mueraasapuenaa, nia queya tojijiaca nia quiri, nia shuquiritiniuria pa Jiyaniijia. ²¹ Pueyanaa, maja nia juaatini nia niquioehua, nojori mariqui maninia miiniucuaaji pishiriiri, puera nia juaashacari nojori. ²² Poonitijosano pueyanaa, puetunu nia camarnu sequesanojuanaa nia

tojiri. Maja na tojijia nia quiniu saaja na shooti-asacari nijaniya, na shuquiritianura nijaniya. Majaari saaja na niqushacari nia poonijionu nia sajonura nojuaja. Seetanujuanaa maninia nia poonijiore pueyaraanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyajetanu, pa Jiyaniijaari nia niqutionutaniya jiyocuacaanu niaara na jiitiasanojiniji. Mijiria camarnura nia poonijosacari, niaa cutaraari Cristora poonijia. Nojuacuajaari nia camarnujuanaa. ²⁵ Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniuujia. Mijiria camarucua, poonitijosano pueyano, naajaa, nojoriiri maja rimiajata Pueyasora.

4

¹ Camarucuaanaa, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhuj.

² Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacarasho”.

³ Naajuhuj, canaacuara nia secojore Pueyaso, nojuaja cuara canaa pohuataniiria pueya niqiuara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyanijia nio nujuatejojuajinia. ⁴ Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

⁵ Maninia nia niishiriojore taa nia miiniutianiya noo pojorini, canapuetucujaja maja Pueyaso muerasuni. Maninia

nia miiri nojori, mijiria nia quishacarijia. ⁶ Nia pocoo-josacari nojoritia, maja najuhuana nia pocuanu. Pueya nia cumaquiri nia sequesanota. Nia niishiriojore taa nia riucuanutaniya tamasaca pueyani, nojori jaara nequeso-tariquia niajaniya Pueyasooocua nia tiuuniujiniji.

Nata quiniaata Pablo saruhuatasacari pueya, naajionu na puecanura

⁷ Pa panishano pa tarajanu Tíquicoori nia pohu-atanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyani-ijira canaa poonijionura. ⁸ Niaacua na jiyaroyanijia na pohuatanura niajaniya taa canaa quiyani, naajuhuaaj, na cumanijianura niajaniya. ⁹ Pa panishano Onésimoori nata quianutaniyajuhuaaj. Nojuacuajaari niajaniyajini-jinio pueyano. Maninia poonijiojua Pueyasora. No-joricuajaari nia pohuatanutaniya puetunu niiquijijianaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuatanura niajaniya nera. Mar-coori nia saruhuataajuhuaaj. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiníri nia tia-jinia. ¹¹ Jesu sesaanucua pueyanoori nia saruhuataa-juhuaaj. Na sesaari Justojuhuaaj. Saa nio pojorijia Ju-diocuacajinijinioori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. ¹² Epafrasri nia saruhuataa-juhuaaj. Nojuajaari Cristo seru niajaniyajinijiojuhuaaj. Nojuajaari pueyaracaanu niaacuara secojoquiaa queraa-tia, jiyanhua cumaatia Pueyasooocua tiuujiaca nia quini-uria. Secojoquiaajaariuhua ritia Pueyaso tojjijia nia quiniuria, puetunu Pueyaso panishanojuanaa nia mi-niuria maninia. ¹³ Seetanujuanaa, Epafrasri jiyanhua tacaquiaa niaacua, Laodicea tiacajinia quiniaa Pueyaso

muerasuucujuhujaj, Hierápolis tiacajinia Pueyaso muera-suucuanio. ¹⁴ Pa panishano naarajona Lucasri nia saruhu-ataa. Demas nia saruhuataajuhujaj.

¹⁵ Canaara nia saruhuatare Laodicea tiacajinia quiniaa parta Pueyaso muerasu. Ninfas nia saruhuatarejuhujaj, na tiajinia rerejonaa Pueyaso pueya maanujuhujaj. ¹⁶ Niaa jaara nio naajionee serojorecuaa nia rerejosacari, Laodicea tiacajinia nia jiyarotarejuhujaj, cuaara serojosaaria Pueyaso pueya maanu niqiara tiijiuhujaj. Naajuhujaj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷ Naa Arquipo nia sequere quiria: “Tama quia cuaqueyajaaja quia cojuare quia tucuatanura quia poonijosano pa Jiyaniijira. Nojuajaari quia jiyatequiaari nera poonijioriquiano”.

¹⁸ Janiyari Pablóni. Quiarijiani, tama cua juaashiquiata-jaaja naajiyanjia saaja cua saruhuatanura nijaniya. Nia niishiriquia, janiyari moronucua nujuatesano quiyani. Pueyaso cuaara cumaquiiria nijaniya na cumaacata jiyanohua. Tariucuaja.

Quiarinio pueyaso rupaa pa jiyaniijia Jesucristojiniji
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21
